

Novogodišnje obraćanje visokog predstavnika i specijalnog predstavnika Evropske unije Miroslava Lajčaka građanima Bosne i Hercegovine



Dragi građani,

U godini koja je na izmaku, većina vas je imala osjećaj frustriranosti i nezadovoljstva zbog sporog rješavanja problema u ovoj državi.

Međunarodna zajednica, Evropska unija i ja razumijemo, a i dijelimo tu frustraciju.

Stranci su došli u vašu državu samo iz jednog razloga – jer vjerujemo da vi zaslužujete svaku pomoć kako bi što prije vodili normalan, evropski život.

Svima je dosta političkih igara i nedostatka napretka i u najosnovnijim pitanjima.

Zbog toga sve češće čujem pozive za smjenu ovog ili onog političara, ili, čak, svih njih zajedno.

Svjestan sam svog mandata i ne bojim se koristiti svoje ovlasti ukoliko bilo ko izađe iz okvira Mirovnog sporazuma.

Činjenica je da, iako smo moji prethodnici i ja koristili svoje ovlasti više od 900 puta, opet imamo političare koji su sposobni duplo povećati svoje plate, ali ne mogu usvojiti više od dvadesetak zakona u godini dana.

Jasno je da bonske ovlasti ne mogu stvoriti bolji životni standard, otvarati nova radna mjesta, ili ukinuti vize.

To jedino mogu učiniti predstavnici koje ste vi birali.

Jasno je i kako to učiniti. Bez sveobuhvatnog plana i efikasne akcije, u idućoj godini ovu državu čeka samo stagnacija.

Unatoč izjavama da je jedan entitet bolji, ili da drugi i dalje predstavlja stvarnu snagu države, mislim da ove izjave nisu ništa više od puke propagande.

I u jednom i u drugom entitetu prosječne plate su oko 780 KM. Prosječna plata u Evropskoj uniji je tri puta veća!

Jedini ispravan put ka takvom standardu je što brža integracija u Evropsku uniju.

Iako smo imali određene pomake, tu mislim naravno na Sporazum o stabilizaciji i pridruživanju potpisan u junu mjesecu, BiH nije ni blizu reformskog zamaha koji će ne samo stvarno poboljšati nego barem olakšati život običnoga građanina.

Znači, potrebno je da se konstantno na bosanskohercegovačke političare vrši pritisak kako bi bilo nemoguće da pobjegnu od odgovornosti. Vidjelo se, ipak, da imaju kapacitet za dogovor na sopstvenu inicijativu, ali to je još uvijek nedovoljno, jer je potrebno konkretizovati dogovoreno.

Znam da građani ove države nisu zadovoljni, ali i da isto tako često misle da ne mogu ništa promijeniti.

Ne slažem se sa ovom procjenom.

Ono malo napretka koji smo vidjeli tokom 2008. godine, desilo

se kada su političari bili suočeni sa obustavom procesa evropskih integracija i postali svjesni kakvo bi nezadovoljstvo to izazvalo kod građana.

Kada se ujedine međunarodna zajednica i građani BiH – stvari mogu da se promijene.

Mi možemo i moramo od evropskih integracija napraviti stvarni prioritet.

Za sve nas 2009. predstavlja jednu kritičnu godinu.

Pored ekonomske i finansijske krize, danas BiH opet zaostaje za zemljama u regionu.

Mnogi u regionu najavljuju da će aplicirati za status kandidata u narednoj godini.

Međutim, u BiH niko nema bilo kakve argumente kojima bi dokazali da je u 2008. godini BiH zaslužila taj status.

U sljedećoj godini očekujem da će pojedine zemlje u regionu dobiti bezvizni režim sa EU. BiH zvaničnici sami priznaju da se to sigurno neće desiti prije 2010.

Sa takvim stavom ne smijemo biti zadovoljni.

Godina 2009. je bitna za BiH, jer već u 2010. opet ulazimo u izbornu godinu. Iskustvo nam govori da će se političari tada opet fokusirati na podjele sa ciljem zadržavanja svojih fotelja, a ne na stvarni rad.

To znači da, ako u 2009. ne napravimo pomak, osuđeni smo na daljnju stagnaciju, radikalizaciju, podjele i izolaciju.

Ubijeđen sam da u sljedećoj godini svi građani ove zemlje zaslužuju konkretne aktivnosti za poboljšanje životnog standarda i ubrzani napredak na evropskom putu. Tu prvenstveno mislim na početak procesa ustavne reforme i napredak u ispunjavanju uslova za bezvizni režim, kao i napredak na

evropskom putu.

Ja ću dati sve od sebe da ukažem političarima da moraju pokazati više mudrosti, a manje neodgovornosti – i pozivam VAS, građane, da mi u tome pomognete. Vi ste ti koji mogu izvršiti neophodan pritisak.

Uz to obećanje i nadu, želim vam srećnu, mirnu i bezbrižnu 2009. godinu.